



Folkpartiet på andra språk: meänkieli

## Folkpartiet – Ruottin liberaali puolue

Folkpartiet liberaalit oon Ruottin liberaali puolue. Vuesta 2006 met olema hallituksessa yhdessä muitten Aliansi Ruottile-puoluheitten kans. Nyt met pyyämä uutta luottamusta – koulun ja töitten vuoksi.

Meän pääkysymykset oon:

- » **Koulu.** Tietotuloksia Ruottin koulussa häätyy parantaa. Met halvaama ette toistukset (betyg) annethaan varemin ja met olema kans ottanheet käythöön varhaisia tietokontrollia, niin ette oppilhaat jotka tarttevat ekstra apua saavat sen maholisiman hopusti. Opettajilla pittää olla vahvempi oikeus pittää oorninkia ja työrauhaa. Mobbausta häätyy voimakhaasti vastustaa.
- » **Työ ja yrittäminen.** Työnteko ja ittensä kouluttaminen häätyy kannattaa. Met olema laskenheet veroja matala- ja keskitulosille yli 1 000 kruunula kuukaussa. Met halvaama jatkaa tuloveroitten laskemista ja parantaa yrittäjitten ehtoja. Met halvaama kans ottaa käythöön oppityöt (lärlings-) niin ette nuoret helpomin pääsevät työmarkkinoile.
- » **Turvalisuus.** Kaikila jotka oon töissä pitäs olla työttömyysvakuutus turvana. Niin ei ole tänä päivänä. Met halvaama kans parantaa vanhoitten turvalisuutta ja antaa laki-suojan vanhuus-pariskunnile asua yhdessä vaikka heistä toinen häätyy siirtyä vanhuuksitten asumisheen. Taistelua raakaa organiseerattua rikolisuutta vasthaan tarttee lisätä.
- » **Integrasjuuni.** Ko Sosiaalidemokraatit jätit vallan integrasjuuni toimi niin huonosti ette keskimäärin meni seittemän vuotta ennenkö tänne maahan siirtyny sai töitä. Met tiämä ette työ ja ruottin kielen ossaaminen oon auaimet integrasjuuhniin – sen takia met pienenämmä semmosen yrityksen kostanuksia joka ottaa vasta tännetulheita töihin. Opetuksele ruottia maahanmuuttajille panhaan selvemät vaatimukset ja paremin koulutetut opettajat. Met halvaama rustata rappeutunheita asuntoaluheita ja jos tarttee, niin repiä osan niistä.
- » **Euruuppa ja mailma.** Met emmä halvaa rakentaa muuria mailmaa kohthaan – met halvaama aukasta sille oven. Vapaa-kauppa oon hyvä niin Ruottile ko muilekki maile. Ruotti pittää olla matkassa EU:ssä kokohnaan – sillä met olemaki euron puolesta. Pakolaisila häätyy olla oikeus jää Ruothiin ette heitä ei ahisteta (förfölja) kotimaassa. Met puolustamma päämäärää ette yks prosentti Ruottin bruttokansantuosteesta (BNP) mennee avun-anthoon. Rahat pittää käyttää

**Välkommen att  
kontakta oss  
om du vill veta mer  
eller bli medlem!  
www.folkpartiet.se  
info@liberal.se  
020-53 53 53**

Vill du hjälpa till i valkampanjen?  
SMS:a VOLONTÄR till 72080  
så kontaktar vi dig.  
Kostar som ett vanligt SMS.

köyhyyden vastustamisheen ja demokraattisen kehityksen parantamisheen. Diktatyrihallituksille Ruotti ei saa antaa apua.

- » **Tasa-arvo.** Vaikeuksia (krångel) ette saa tasa-arvoboonususta ko oon vanhempainvapaalla häätyy vähentää – rahat häätyvät mennä suohraan palkkakonthuun ilman ette sinun häätyy tehä hakemus. Ottaa käythöön tasa-arvoboonus joka antaa enämpi rahhaa semmosille pariskunnile jotka jakavat lastenhoitopäivät (vab-dagar) tasasesti ko lapsi oon siukka. Koventaa rangastusta rikoksesta raaka vaimonpuolisitten rauhan loukkaaminen. Panna elektrooninen jalkakahle (fotboja) miehile jotka rikkovat lähestymiskieltoa.
- » **Klimaatti.** Klimaattimuutokset oon tämän ajan suuriin miljööhka. Met halvaa-pittää jäljelä ja kehittää Ruottin yinvoimaa (kärnkraft) niin ette hiilidioksiidipäästöt pienenevät. Met tarttema kansanvälisen ja sitovan klimaatti-sopimuksen. Tuulivoimaa ja muita uusiutuvia energioita tarttee lisätä ja energiasäästämistä kans.

## Tulevaisuuden haasteet

Kansanvälinen ekonoominen kriisi oon iskeny kovasti Ruottia kohtaan. Mutta Aliansihallituksen insatsitten ansiosta Ruotti oon selviny kriisistä paremin ko monet muut maat.

Met olema panheet työt ensi-sijale. Vastuulisen finansipolitiikan ansiosta met olema saattanheet stimyleerata ekonoomiitä. Ilman hyvin hoiettuja valtiofinansia viimisitten vuositten laskukauhen tulos olis ollu leikkauksia hyvinvoinissa ja nostetut verot.

Seuraavalla mandaatti-kauela ekonoomiselle kasvule oon hyvät mahdollisuuet. Mutta meän kotimaisen toipumuksen voima riippuu siitä mitä politiikkaa kotikentälä käytethään. Tärkeintä oon ette useamat saavat töitä. Työverovähenny (jobbskatteavdrag) oon tehny sen, ette oon kannattavampaa olla töissä, mutta useampia vero- ja sääntömuutoksia tarvithaan.

Nuorile jotka tarttevat oppia jonku ammatin, pittää pystyä tarjoamaan oppitöitä (lärlings-).

Se häätyy kannattaa hommata ittele koulutus. Se häätyy kannattaa ottaa riskin alottaa oman yrityksen. Töihin ottaminen häätyy olla helpompaa. Ruotti pittää olla eeläkäviä-maa joka houkuttellee tutkimusta ja uusia iteoita muista maista.

Meän maa oon riippuvainen teolisuuesta joka vaatii paljon energiitä. Uusi yinvoima niitten reaktoritten eestä jotka oon vanhoja ja sen takia poistethaan, saattaa antaa Ruottile hiilidioksiidistä vappaa sähköä meän perusteolisuuete.

Ette työnteko ja kouluttaminen tullee kannattavaksi, Ruotti häätyy mennä takasi siihen ette ”puolet jäljelä” palkan noususta – kukhaan ei piä maksaa enämpi ko 50 prosenttia veroa viimeksi tienatusta satalappusesta.

Onnistunheen integrasjuunin auaimet oon työ ja ruottin kielen taito. Koulutusta ruottia maahanmuuttajille tarttee parantaa. Alkhuunpääsytöt (instegsjobb) ja uusstarttityöt helpottavat vastatulheitten työmarkkinoile pääsyä.

Sille joka menettää työn oon tärkeää ette oon olemassa toimiva työttömyysvakuutus. Ylhein työttömyysvakuutus otethaan käythöön.

## Koulutus mailmanluokkaa

Koulu oon meän paras työkalu antamaan kaikile ihmisille samat mahdollisuuet elämässä. Oikealla koulupolitiikala kaikki oppilhaat saavat mahdollisuuden onnistua.

Se uus-startti joka nyt viethään läpi Ruottin koulussa oon Folkpartietin päätehtävä. Totistukset otethaan käythöön kuuenesta vuosikursista ja uusi opettajakoulutus oon jo käytössä. Kansaliset kokheet (prov) oon nyt olemassa kolmanella vuosikursila,

ja niitä täytenethään nyt antamalla parempaa tukea niile oppilhaile jotka ei saavuta päämääriä. Valtion pitäs olla koulun päämies.

Yks tapa päästä osaliseksi globaliseerinkistä oon hyvä kielitaito viehraissa kielissä. Sen takia se oppilas joka lukkee vähhiinthään kahta vierasta kieltä peruskoulussa, pitäis saa räknätä sen hyväksi ko hän hakkee lukio-/gymnaasiakouhluun. Kiinan kielestä pitäs tulla uusi vieras kieli lukiossa.

## **Yhtheistyötä globaliseerinkin aikana**

Ruottila pitävät olla ovet auki mailmale – ei muurit jotka oon kiini. Ennen kaikkia EU:n kautta Ruottila oon maholisuus olla matkassa vaikuttamassa kehityksheen mailmala. Met halvaama syventää Euruuppayhtheistyötä, ja euron pittää ottaa käyttöön Ruottin valuuttana.

Kaikki voittavat vapaa-kaupala. EU:n tullimuurit köyhiä maita kohthaan häätyy repiä. Rikhaala mailmala oon kans moralinen vastuu tukea taistelua köyhyyttä vastaan ja tukea demokratiaa. Avunannon yhen prosenttin päämäärän häätyy säilyttää.

Met puolustamma auttavaista pakolaispolitiikkaa. Turvapaikkaoikeus (asyl-) oon ihmisoikeus. Ihmisillä, jotka pakenevat ahistusta, oon oikeus saa turvan Ruottissa ja muissa vaphaissa maissa.

## **Turvalisuus**

Turvalisuutta rikoksia vasthaan tarttee parantaa. Met olema lisähneet poliisimäärää 17 000:sta 20 000:heeen. Etukätheen tehty työ ja nopeat reaksjuunit oon rohki tarpheeliset vastustamhaan nuoria jäämästä kiini rikolisuukshiin.

Se ei ole kunnialista ette hyvinvointimaa pakottaa ihmisiä jotka koko elämän oon elähneet yhessä, eroahmaan ko toinen heistä ei ennää pysty asuhmaan kotona. Tarvithaan uusi laki joka puolustaa vanhemitten pariskunnitten oikeutta asua yhessä – viimisenki ajan.

Psykiatrihaan pitäs satsata lissää. Se joka akyytisti hakkee psykiatrista apua, häätyy paikala saa sitä. Huonon saavuttavuuen (tillgänglighet) henkilöile joila oon alennunnu toimintakyky, pittää nähä diskrimineerinkinä.

## **Kokoama voimat tasa-arvon puolesta**

Tasa-arvo oon kysymys vaphauesta. Met hääymä jatkossaki keskittyä vaimonpuolitten ekonoomisheen ittenäisyytheen. Osa-aikatyötä, jota ei itte valitte, häätyy vastustaa. Tasa-arvo-boonus häätyy olla yksinkertasempi ja sitä häätyy parantaa, se kehottaa lasten vanhempia olheen tasa-arvosia vanhempia.

Väkivalta vaimonpuolia kohthaan, juuri sillä ko net oon vaimonpuolia, oon akyytti tasa-arvo-kysymys. Taistelu seksuaalirikoksia vasthaan häätyy voimistua ja niissä häätyy enämpi keskittyä tekijöin.

## **Yinvoimaa kliimaatin vuoksi**

Kliimaattikysymys oon meän suuriin yksittäinen globaali haaste. Ruotti ja EU häätyvät jatkaa työtä globaalin kliimaattisopimuksen puolesta, ja met hääymä kans mennä eessä ja meilä häätyvät olla korkeat kliimaattipäämäärät.

Uutta yinvoimaa häätyy rakentaa, ja niilä korvata nykyset reaktorit ko net oon tehnee omansa. Yhistämällä uutta yinvoimaa ja satsauksia uusiutuvhaan energihaan Ruottin sähkötuotanto oon tulevaisuuessaki vapaa hiilidioksiidistä. Kliimaattityössä oon keskheistä puolustaa biologista moninaisuutta eikä hukata muita miljöö-päämääriä, niinku merimiljöö-työ.

Sähkö-biilin kehittäminen vähentäs rohki transporttialan päästöjä. Palkkio kliimaattibiilile otethaan käythöön.